

Nilai kekeluargaan, kejiwaan di Malaysia masih lagi tinggi

Kuala Lumpur: Nilai kekeluargaan dan kejiwaan di negara ini masih tinggi berikutan statistik menunjukkan 81.9 peratus penduduk makan bersama keluarga ketika makan malam, manakala 93.5 peratus penduduk berinteraksi bersemuka dengan jiran dalam tempoh sebulan.

Ia berdasarkan penemuan dalam Penerbitan Banci Malaysia 2020: Kesejahteraan Penduduk (Hubungan Sosial) yang diterbitkan kali pertama berdasarkan dapatan daripada Banci Penduduk dan Perumahan Malaysia 2020 (Banci Malaysia 2020).

Penerbitan bagi Hubungan Sosial adalah jilid kedua siri penerbitan Kesejahteraan Penduduk selepas Kecergasan yang dikeluarkan Jun lalu, memaparkan statistik penduduk berusia 15 tahun ke atas dalam empat segmen, iaitu pengguna akaun media sosial, akses kepada internet, makan bersama dalam masa seminggu dan interaksi bersemuka dengan jiran dalam tempoh sebulan.

Ketua Perangkawan, Datuk Seri Dr Mohd Uzir Mahidin, berkata berdasarkan respon 13.3 juta penduduk (53.9 peratus daripada 24.7 juta penduduk berusia 15 tahun ke atas), seramai 10.9 juta orang (81.9 peratus) makan bersama sebagai sebuah keluarga atau dengan ahli isi rumah dalam tempoh seminggu ketika makan malam.

“Seramai dua pertiga (73.4 peratus) bersarapan dan 67.4 peratus makan tengah hari bersama.

“Peratusan responden makan bersama lebih rendah ketika minum petang (19.4 peratus), kudapan (15.3 peratus) dan makan lewat malam (5.9 peratus)

dalam seminggu.

“Dari segi kekerapan, lebih 50 peratus responden makan bersama lima hingga tujuh kali seminggu semasa sarapan pagi (60.3 peratus), makan tengah hari (57.1 peratus) dan makan malam (75.9 peratus),” katanya dalam kenyataan, semalam.

Mohd Uzir berkata, Sarawak mencatatkan peratusan tertinggi bagi makan bersama lima hingga tujuh kali seminggu untuk sarapan pagi, iaitu sebanyak 76.4 peratus, makan tengah hari (72 peratus) dan kedua tertinggi untuk makan malam (86 peratus), manakala Putrajaya paling kurang makan bersama satu hingga dua kali seminggu semasa sarapan pagi (45.3 peratus), makan tengah hari (52 peratus) dan makan malam (18.8 peratus).

“Secara umum, lebih ramai wanita makan bersama ketika makan malam (5.5 juta orang), sarapan pagi (4.9 juta orang), makan tengah hari (4.6 juta orang), kudapan (1.1 juta orang) dan minum petang (1.4 juta orang).

“Lelaki sebaliknya, lebih ramai makan bersama semasa makan lewat malam (398,234 orang) dan makan malam bersama menjadi rutin paling popular dalam kalangan individu dari semua peringkat umur dan kumpulan etnik,” katanya.

Dari segi interaksi dengan jiran, berdasarkan maklum balas daripada 14.8 juta (59.9 peratus) penduduk, 13.8 juta responden (93.5 peratus) terbabit dalam interaksi bersemuka dengan jiran dalam tempoh sebulan, manakala 958,808 orang (6.5 peratus) tidak pernah mempunyai interaksi bersemuka.